

इवनिंग डोगरी न्यूज़ बुलेटिन

समे .1815

<><><><><><>

Headlines

1. प्रधानमंत्री नरेन्द्र मोदी होरें अहमदाबाद च ब्हाई जहाज हादसे आली थाहरे दा दौरा कीता, वरिष्ठ अधिकारिएं कन्नै समीक्षा बैठक कीती।
2. मुख्यमंत्री उमर अब्दुल्ला होरें केन्द्र सरकार गी आग्रह कीता जे ओह ईरान च बधदे तनोतनी आले हालातें गी दिखदे होई उत्थें फसे दे जम्मू कश्मीर दे विद्यार्थिएं दी सुरक्षा जकीनी बनाए।
3. कटरा—श्रीनगर वंदे भारत एक्सप्रेस रेलगडिडएं आस्तै यात्रुएं आस्सेआ जबरदस्त मंग दिक्खी जा'रदी ऐ।
4. राजौरी च कब्जा रेखा कोल जंगलै च भारी अग्न लग्गी गई ऐ, अग्न स्थालने दे जतन जारी।
- 5- मौसम विभाग नै जम्मू कश्मीर च थोड़े समें आस्तै बरखा दी पेशगोई कीती ऐ, जेहदे कन्नै गर्मी शा राहत थोई सकदी ऐ।

<><><><><><>

PM Crash(byte)

प्रधानमंत्री नरेन्द्र मोदी होरें एयर इंडिया दे दुखद बहाई जहाज हादसे च बचे दे लोकें कन्नै मलाटी करने आस्तै अहमदाबाद सिविल अस्पताल दा दौरा कीता। हादसे च 241 लोकें दी जान गई ही। उनें इस नुकसान गी मंदे भागे आला दस्सदे होई डूंग्गा बसोस प्रकट कीता ते सौहगे परोआरें प्रति संवेदना प्रकट कीती। प्रधानमंत्री मोदी होरें हादसे च बचे दे इक्को—इक्क यात्री विश्वास कुमार रमेश होरें कन्नै बी मलाटी कीती। रमेश होर भारती मूल दे ब्रिटिश नागरिक न। घटना दे विनाशकारी अनुभव गी सांझा करदे होई रमेश होरें आखेआ

प्रधानमंत्री होरें मगरा हादसे आली थाहरे दा दौरा बी कीता। उनें अहमदाबाद च इक समीक्षा बैठक बी कीती ते बचाह कम्में दा जायजा लैता। हुनै तगर 6 लोथें गी पोस्टमार्टम दे परेंत रिश्तेदारें गी सौंपी दित्ता गेआ ऐ। घटना दी जांच इसलै जारी ऐ ते सुरक्षा अर्जेंसिएं सक्रिय रूपै कन्नै हादसे आली थाहरे पर तपाशी अभियान चला'रदियां न।

<><><><><><>

JK Crash Grief(byte)

अहमदाबाद च कल होए दे जहाज हादसे पर जम्मू कश्मीर दे लोकें बी अपनियां संवेदना जाह्र कीतियां। इस हादसे च 241 लोक मारे गे हे। एह डोआरी अहमदाबाद थमां लंदन ला'रदी ही। जम्मू खित्ते दे राजौरी जिले दे बलिदान स्तम्भ थाहर इस हादसे च मारे गेदे लोकें गी श्रद्धांजलि भेंट कीती गई। लोकें दिव्यंगत आतमाएं दी शांति लेई प्राथना कीती। इस मौके पर बोलदे होई इक मकामी नै आखेआ.

<><><><><><>

CM Students Return

इजराइल ते ईरान बश्कार चला'रदी मूदा तनोतनी गी दिखदे होई मुखमन्त्री उमर अब्दुल्ला होरें विदेशी मामले सरबन्धी मंत्रालय गी अपील कीती ऐ जे ओह ईरान च फसे दे जम्मू कश्मीर दे विद्यार्थिं दी सुरक्षा गी जकीनी बनाया जा। सोशल मीडिया गी इक पोस्ट च मुखमन्त्री होरें स्थिति पर चिंता जाहर कीती। उनें आखेआ जे बच्चे दे परोआर आले चितित न। विद्यार्थिं दी हिफाजत लेई हर मुमकिल गैह पुट्टी जानी लोडचदी। उनें परोआरें गी भरोसा दोआया जे सरकार मुश्कल दी घड़ी च उंदे कन्नै ऐ ते स्थिति पर नेझमी तक्क रक्खा'रदी ऐ।

<><><><><><>

Itoo Social Welfare

समाज कल्याण ते शिक्षा सरबन्धी मैहकमे दियां मंत्री सकीना इत्तू होरें श्रीनगर द सिविल सचिवालय च इक बैठक लाई ते ओल्ड एज पेंशन, विधवा पेंशन, लाडली बेटी, ब्याह शादिं सरबन्धी मदद ते आईएसएसएस स्कीम तैहत् लाभार्थिं गी लाह जारी करने दी समीक्षा कीती। उनें जम्मू कश्मीर बैंक गी आखेआ जे ओह समें सिर उनेंगी मदद उपलब्ध करोआन, खास करी घट्ट आमदनी आले ते हाशियै पर रौहने आलें गी। जवाबदेही पर जोर पांदे होई मंत्री होरें आखेआ जे समाज कल्याण, आत्म सम्मान ते सशक्तिकरण लेइ ऐ। एह छड़ा माली मदद नेई ऐ। उनें सारी स्कीमें दी पूरी चाल्ली अमलावरी पर जोर पाया तां जे हर इक योग्य लाभार्थी गी एह्दे थमां लाह होइ सकै ते उंदे जीवन च सकरातमक बदलाव आई सकै।

<><><><><><>

Prog. App. Blood

आकाशवाणी जम्मू दा क्षेत्रीय समाचार एकांश, औंदी 14 जून गी मनाए जाने आहले विश्व रक्तदाता दिवस दे सरबन्धै च 20एं मिनटें दी इक बशेश परिचर्चा प्रसारित करा'रदा ऐ। एह परिचर्चा 14 जून गी दपैट्टी साङ्गे 12 बजे प्रसारित कीती जाहग। इस परिचर्चा च स्हाड़ी मेहमान होइन गौरमैट मेडिकल कॉलेज अस्पताल जम्मू दे ब्लड ट्रांसफ्यूजन विभाग दिआं प्रमुख, डाक्टर मीना सिद्धु जिंदे कन्नै गल्लबात करइन स्हाड़ी न्यूज एंकर अभिलाषा शर्मा ते में विजय बजाज। तुस एह कार्यक्रम स्हाड़े इस्सै चैनल पर मीडियम वेव 990 किलो हर्ट्ज ते एफएम 100 इशारिया 3 मेगाहर्ट्ज पर सुनी सकदे ओ।

<><><><><><>

Record Booking (byte)

किश ध्याड़े पैहले गै शुरू कीती गेदी कअरा—रीनगर वंदे भारत एक्सप्रेस रेलगड्डी दे यानुएं आस्सेआ जबरदस्त मंग दिखने गी लबीा करदी ऐ। इस ट्रेन आस्तै हाल दे दिनें च रिकार्ड बुकिंग होई ऐ। रेलवे दे इक वरिष्ठ अधिकारी मूजब कटरा ते श्रीनगर बश्कार चलने आली दो वंदे भारत एक्सप्रेस रेलगड्डीएं आस्तै 26 जून तगर कोई बी सीअ उपलब्ध नेई ऐ ते अग्रिम बुकिंग बी जुलाई म्हीने तगर होइ गेदी ऐ। 3 जुलाई गी शुरु होने आली सलाना श्री अमरनाथ जी दी यात्रा दे कन्नै यात्रिं दी गिनतरी च होर बाद्धा होने दी मेद ऐ। यात्रिं ते तीर्थयात्रिं दे अलावा केई मकामी बसनीकें इस रेल सेवा दा उपयोग करा दे न। श्री माता वैष्णो देवी कअरा रेलवे स्टेशन दे स्टेशन सुप्रीटेंडेंट जुगल किशोर शर्मा होरे जानकारी दिंदे होई आखेआ.

<><><><><><>

Samba Amarnath(byte)

श्री अमरनाथ जी की यात्रा च औले आले श्रद्धालुएं आस्तै इक अरामदायक ते सुरक्षत अनुभव निश्चत करने लेई अधिकारी यात्रा शा पैहले लोकें दे ठैहरने आले केन्द्रें ते पारगमन शिविरें च तैआरिएं गी अमली तोड़ चाढ़ा दे न। इस सिलसिले च सैलसफा मैहकमा जम्मू दे निदेशक विकास गुप्ता होरें अधिकारिएं कन्नै चला'रदे कम्में दा जायजा लैने आस्तै अज्ज साबा दा दौरा कीता। उनें दयानी च बजार गेदे ट्रांजिट कैप दा निरीक्षण कीता। अधिकारिएं आखेआ जे 3 जुलाई गी यात्रा शुरू होने शा पैहले गै सब्बै केन्द्र पूरी चाल्ली कन्नै तैआर होई जांगन। आकाशवाणी समाचार कन्ने गल्ल करदे होई सैलसफा मैहकमा जम्मू दे निदेशक विकास गुप्ता होरें आखेआ

<><><><><><>

Rajouri Forest Fire(byte)

मजूदा गर्मी की लैहर दे बिच्च राजौरी जिले रु कब्जा रेखा दे कोल स्थित मानुपर ग्रां दे जंगली इलाकें च अज्ज अग लगी गई। तेज हवाएं दे कारण अग ते तौले गै आस्से पाससे दे खेत्तरें च फैली गई। जंगले आले मैहकमे ते जंगल सुरक्षा बलें आस्सेआ रंभे गेदे अग सहालने ते अभियान च सक्रिय रूपा कन्ने प्रगति होआ'रदी ऐ। मकामी बसनीकें बी अग गी सहालने दे जतनें च हिस्सा लैता। पेश ऐ इस बारे साढ़े संवाददाता की इक रिपोर्ट

<><><><><><>

Weather

जम्मू कश्मीर च पवा'रदी गर्मी थमां लोकें गी किश राहत थोई सकदी ऐ की जे मौसम विभाग नै अज्ज संजा किश थाहरें पर बरखा ते धूल भरोची अंधी झक्खड़ चलने की पेशगोई कीती ऐ। 14 जून थमां 16 जून बरकार किश थाहरं पर हल्की बरखा होई सकदी ऐ 17 थमां 20 जून तगर मौसम गर्म ते खुश्क बने दा रौहग। उआं 21 जून थमां 23 जून तगर मौसम च बदलाव दिखेआ जाई सकदा ऐ की जे मती सारी थाहरें पर बरखा ते गरज चमक कन्नै कनियां पेई सकदियां न।

<><><><><><>

PTC Announcement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 ब'रें दे बरकार ऐ ते ओह कठुआ जिले दा रौहने आहला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 ब'रें दा तजुर्बा होना लोड़चदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंघत लोड़चदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर की 10 किलोमीटर की हद्द दे अंदर-अंदर रौहदा होना चाईदा ऐ। दरखास्त ते लोड़चदे दस्तावेजें की कॉपी मेदवार गी क्षेत्रीय समाचार एकांश आकाशवाणी जम्मू कश पंजीतीर्थी 15 जून 2025 थवां पैहले-पैहले आइए दस्ती जमा करोआनी होग। इस बारै व्यापक जानकारी आकाशवाणी की वेबसाइट www.newsonair.gov.in पर उपलब्ध ऐ।

<><><><><><>